

# মুখোশ ও মুখশ্রী

(গল্পগ্ৰন্থ - মুখোশ ও মুখশ্রী)

বিকেল হয়নি ভালো করে।

তরলা লাইলাক রংয়ের ভয়েল শাড়ি পরে টেনিস কোর্টে বসে প্রতীক্ষা করছে মি.বাসুর। মি.বাসুকে এ অঞ্চলে কে না জানে? বিখ্যাত টেনিস-খেলোয়াড় মি.বাসুর কৃশ, দীর্ঘ, সুন্দর, যৌবনশ্রী-মণ্ডিত চেহারা আলিপুর অঞ্চলের ও বালিগঞ্জ অভিজাত-পল্লীর প্রত্যেক টেনিস কোর্টকে অলঙ্কৃত করেছে—তঁার নিখুঁত সাহেবী পোশাক ও নিখুঁততর আদবকায়দা অনেক ঈর্ষাপরায়ণ তরুণের অনুসরণ-কেন্দ্র।

সেদিন বইয়ের এজেন্ট মি.সেনকে দেখে এরা বুঝেছিল এ তাদের সেটের লোক নয়।

অণিমা নাক সিঁটকে বলেছিল—ও, মি! টাইটার রং এমন বিশ্রী? টেস্ট বলিহারি ভদ্রলোকের। ওই টাই পরে—ইট ইজ বিঅন্ড মি! সিওরলি ওয়ান শুড নো হাউ টু ড্রেস প্রপারলি!

তরলা মুখে রুমাল দিয়ে বলেছিল—স্-স্-স্! নো ব্যাড্ রিমার্কস ডিয়ারি—যার যা তার তা।

—জানি। তবুও ওয়ান শুড—

—হি-হি-হি-হি—

—তবে? তুমি নাকি বড়—হঠাৎ এত খুশি যে? ব্যাপার কি?

—জানিনে।

—আমি জানি। মি.বাসু আজ টেনিসে আসছেন, না?

— (সুরে) দেয়ার আর ওয়াইল্ড্ ক্যাট্‌স্ দ্যাট্‌ রোম্‌ দি গড্‌স্-রোড্‌, গ্রীন আইড্—অ্যান্ড্ অ্যাফ্রেড্ অফ্‌ নান্‌।

—থাক্—থাক্—বুঝেচি। ওয়াইল্ড্ ক্যাট্‌স্ দেয়ার আর এনাফ্‌ অ্যান্ড্ টু স্পেয়ার—বাট্—

—চুপ্‌।

—সত্যি, কিছু হবে নাকি?

—কি হবে? (কৃত্রিম কোপে)

—বাঃ, রাগ করো। সুন্দর মানায়।

—নো ফ্ল্যাটারিং প্লিজ্—

—অ্যাট্‌ লিস্ট্‌ নট্‌ ফ্রম্‌ মি, কেননা তার চেয়েও ভালো সোর্স্‌ রয়েছে। না?

—চুপ

—বাস, চুপ করলাম। তরলা-সরলা কোথায়?

—ওপরে আছে বোধ হয়।

—তার সেই হাঁদামুখো ভবঘুরেটা আজ নাকি কলকাতায় এসেচে শুনলাম! এখানে আসবে নাকি?

—বোধ হয়। সরলা তো কাল রাতে ঘুমোয়নি তার কথা ভেবে।

—পোশাক পরা একটা বিশিষ্ট লক্ষণ ভদ্রলোকের। যে তা না জানে—

একে একে মেয়েরা এল, সঙ্গে সঙ্গে এলেন মি. দাস, মি. সেন, মি. চক্রবর্তী ইত্যাদি। এঁদের কাজ হচ্ছে শুধু একটি আমোদের স্থান থেকে আর একটি আমোদের স্থানে যাতায়াত করা। এঁদের প্রত্যেকের নিজের মোটর আছে, এসেছেনও সেই মোটরে। জীবনে এঁদের একমাত্র লক্ষ্য কি করে ভালো টেনিস খেলা যায়। বিদেশের টেনিস-বিজয়ীদের নাম এঁদের মুখস্থ।

মি. সেন এদের মধ্যে এসেচেন বেশি দিন নয়, নিজের মোটর আছে, বিলিতি বই-বিক্রেতাদের এজেন্ট। অর্থের দিক থেকে ভালোই উপার্জন, তবে সংসারও ছোট নয়, অনেক বুঝে চলতে হয়। ইনি স্ত্রীকে আনতে সঙ্কোচ বোধ করেন এখানে, কারণ তিনি একেবারে গ্রাম্য মেয়ে,এ দলে মেশবার উপযুক্ত নন।

সরলা নেমে এল ওপর থেকে। বেশ মেয়েটি, একটা সাদা সিল্কের শাড়ি, হাতে রিস্টওয়াচ, চোখে চশমা, বেশ সাদাসিধে চালচলন। মুখের ভাব দেখে মনে হয় কি একটা চিন্তা করচে অনেকক্ষণ থেকে।

অণিমা বল্লে—এসো সরলা। এত দেরি?

—মাথা ধরেছিল।

—অসময়ে?

—এই সময়েই তো ধরে। একটা অ্যাসপিরিন খেলাম—

—হাট-ডিপ্রেসান্ট—বড়—

—হলে কি করবো?

—খেলবে না?

সরলা উত্তর দেবার আগেই দুটি ভূত্য ট্রে-হাতে চুকে সকলকে বরফ দেওয়া পানীয়, বরফশীতল স্কীর ইত্যাদি পরিবেশন করতে লাগলো। তরলা দাঁড়িয়ে উঠে বল্লে— মি. দাসকে দাও। ও, আপনার চলবে না? কি দেবে? আচ্ছা চা-ই নিয়ে এসো। আর কেউ চা? সরলা, একটু দ্যাখো না ভাই।

এমন সময়ে মি. বাসু লনে এসে ঢুকলেন। লম্বা, একহারা চেহারা, নিখুঁত পোশাক, নিখুঁত আদবকায়দা, সুপুরুষ বলতে যা বোঝায় তাই। চালচলনের কায়দা ছায়াচিত্র - অভিনেতা মরিস সিভ্যালিয়ারের কথা স্মরণ করিয়ে দেয়—যদিও মরিস সিভ্যালিয়ারের দিন ফুরিয়ে গেছে অনেককাল। সকলে চেয়ে দেখলে মি.বাসুর দিকে। তরলার মুখ উজ্জ্বল হয়ে উঠলো—কিন্তু সে অপরদিকে মুখ ফিরিয়ে রইলো। মি.বাসু হচ্ছেন মল্লিক-বাড়ির এ টেনিস ময়দানের সিংহ। নামকরা খেলোয়াড়। কি করে টেনিস খেলতে হয় স্টাইলের সঙ্গে তা এখানকার অনেকেই এঁর কাছে শিখেছেন, যদিও মুখে স্বীকার করেন না।

মি. দাস বল্লে—দেরি যে? উই আর অল্ অ্যাওয়েটিং ইওর ভেরি প্রেশাস প্রেজেন্স।

মি.বাসু বল্লে—রি-য়্যা-লি?

—আস্ দেম্—আস্ দি লেডিজ্—

মি.বাসু বিলিতি কায়দায় মাজা থেকে নুয়ে পড়ে অভিবাদন করলেন। মুখে কোনো কথা বল্লে না। অতি চমৎকার দেখালো জিনিসটা কায়দার দিক থেকে। অণিমা শীলা সেনের কানে কানে বল্লে—আই কল্ দ্যাট্ স্মার্টনেস, না?

শীলা সেন মি. সেনের ভাগিনেয়ী, সুন্দরী ও সুগায়িকা, টেনিস খেলায় হাত ভালো। মেয়েপুরুষের সম্মিলিত ক্রীড়ায় অনেক টেনিস ময়দানে দেখা যায়—ফিরিজি-পাড়ায় এবং আলিপুর্বে বালিগঞ্জ।

খেলা আরম্ভ হবার আর বেশি দেরি নেই। সবাই সবাইকার সঙ্গে কথাবার্তায় মত্ত, সরলা ছাড়া। সে বিমর্ষভাবে একটা পাম গাছের ছায়ায় বসে আছে তৃণভূমির কোণে। হঠাৎ কাকে দেখে সে যেন খুশি হয়ে দাঁড়িয়ে উঠলো। অণিমা চেয়ে দেখলে মি. সুর ওদিকের গেট দিয়ে ময়দানে ঢুকচেন। মোটাসোটা লোক, একটু বেঁটে অথচ থলথলে নয়, বেশ আঁটসাঁট গড়নের চেহারা। মুখে চোখে উদার হাসি। নস্যি-রংয়ের সুট পরনে— ভালো মানায়নি— যেন বালিশের-খোল-পরা গোছের দেখাচ্ছে।

অণিমা নাক সিঁটকে জনান্তিকে বল্লে—বাব্বাঃ—কি লাউড কলার!

তরলা কৌতুকের স্বরে বললে—আবার পরচর্চা? তোমাকে তো বলেছি, যার যা তার তা।

অণিমা চুপিচুপি বললে—সরলা বেচারির জন্যে দুঃখু হয়। আই ডু পিটি হার—

—তোমার কিছু করবার আছে?

—কিছু না।

—তা হলে সেকথা ছেড়ে দাও। সরলাকে হিন্ট দিয়েছি কতবার, ও বোঝে না। এই সময়ে মি. সেন বলে উঠলেন—ওয়েক আপ লেডিজ—

খেলা আরম্ভ হয়ে গেল। মেয়েরা যে যার স্থানে দাঁড়িয়ে গেল। উঠলো না কেবল সরলা আর উঠলেন না মি. সুর। মি. সুরকে দু-একজন কৃত্রিম আগ্রহের সঙ্গে অনুরোধও করলে, তিনি বললেন, খেলা তিনি জানেন না ভালো, তিনি শুধু দেখতে এসেছেন।

কিছু পরে খেলোয়াড় দল বিশ্রাম করতে এল। অমনি গৃহভৃত্য ছুটে এসে সকলের হাতে হাতে ঠাণ্ডা বার্লির জল, চা, বরফ-মিশ্রিত পানীয় বা কফি পরিবেশন করতে লাগলো। মি.বাসুর নৈপুণ্যের প্রশংসায় মুখর হয়ে উঠলো চারিদিক। সকলে ঘিরে দাঁড়ালো মি.বাসুর চারিদিকে।

মি.সেন বললেন—মি.বাসু ভাবচি আপনার শিষ্য হবো। আই উড বি প্রাউড টু বি ইওর ডিসাইপ্ল!

মি.বাসু বার্লির জলের গ্লাসে চুমুক দিয়ে কায়দার সঙ্গে সিগারেট ধরিয়ে বললেন—গুরু হবার কৃতিত্ব দাবী করতে পারিনে।

অণিমা বললে—কি যে বলেন—

—কেন? মিথ্যে বললাম?

—অতিশয় বিনয়ের কথা হোল। আপনার যা হয়েছে, ক'জনের ও রকম সৌভাগ্য ঘটে? আপনার খেলা দুচোখ ভরে দেখলেও আই উড থাস্ট ফর মোর—

—ধন্যবাদ—

—না, সত্যি বলচি, আমাকেও আপনি শিষ্য করে নিন না।

—শিষ্য? ব্যাকরণ ভুল হল, শিষ্যা হবে কথাটা।

—যা বলেন। না সত্যি, করে নিন না শিষ্যা।

—তথাস্তু।

সকলে হেসে উঠলো। তরলা বললে—কথা বলবার কি সুন্দর ভঙ্গি। ও-ও শিখতে হয় আপনার কাছে।

—অণিমা বললে—একশো বার।

মি. সেন বললেন—বাঃ, আমি কথাটা তুললাম,আর আপনি ও তরলা দেবী কথাটা একচেটে করে নিলেন দেখচি।

মি. বাসু হেসে বললেন—লেডিজ প্রিভিলেজ—

এই সময়ে পুনরায় খেলা আরম্ভ হওয়ার সময় হোল। সবাই যে যার জায়গায় খেলতে উঠে চলে গেল। মি.বাসু নিজের র্যাকেটের তাঁতগুলোতে হাত দিয়ে বললেন— একখানা ভালো র্যাকেট দিতে পারেন কেউ? পটিগুলো ঢিলে হয়ে পড়েছে, দুটো ছিঁড়ে গিয়েছে-বড্ড অসুবিধে হচ্ছে —

তরলা বললে—এই নিন আপনি আমার-খানা।

—আপনি?

—আমি আনিয়ে নিচ্ছি—

অণিমা বললে—না হয় আমারটা নিন—

—না থাক। দুজনকেই ধন্যবাদ। এবারটা আমি এতেই চালিয়ে নেবো। তারপর মি.সুরকে দেখিয়ে চুপিচুপি বক্সেন—ও ভদ্রলোকটি কে?

অণিমা চুপিচুপি উত্তর দিলে—একটি নিরীহ ভদ্রলোক।

—পরিচয় কি?

—মি. সুর না সোম, কি জানি।

—ও, কি করেন?

—ভবঘুরে। এ জেন্টলম্যান উইদাউট এনি ডিনোমিনেশন!

—এখানে আগে কখনো তো দেখিনি।

—অনেকবার এসেছেন। মাঝে মাঝে আসেন। সরলা গুঁকে পছন্দ করে।

—রি-য়্যা-লি?

—শুন্টি। আসুন, ইন্ট্রোডিউস করে দিই না?

ওরা সকলে আবার খেলতে গেল। এরা নিজের ভাবেই নিজে বিভোর হয়ে আছে, তরলা একটা নীল রংয়ের স্কার্ফ-রিফ নট করে বেঁধে ছোটোছোট করে বেড়াচ্ছে র্যাকেট হাতে? মি.বাসু খেলার বিষয়ে কি একটা কথা তাঁর পার্টনার অণিমাকে বলছেন। অণিমার চোখে সপ্রশংস মুগ্ধ দৃষ্টি। এখানে যে ক’টি মেয়ে আছে—এদিকে এরা,ওদিকে মি. সেনের বড় মেয়ে মৃদুলা, শ্যালিকা মঞ্জুশ্রী—সুনিপুণ খেলোয়াড় মি.বাসুকে এরা ইষ্টদেবের আসনে বসিয়েছে। একটুখানি খেলা বন্ধ হোলেই মি. বাসুর চতুর্দিকে তরুণীরা মুগ্ধনেত্রে ভিড় করে দাঁড়াবে এবং রজত-বিগলিত-কণ্ঠের কলধ্বনি শুরু হয়ে যাবে।

কিছুক্ষণ কেটে গেল। মি.সুর একটি সিগারেট নিয়ে সবে ধরিয়েছেন,এমন সময় সরলা এসে গুঁর কাছে বসলো। বক্সেন—কি ভাবছেন?

—ভাবটি মিস মিত্র, আমি খেলতে পারি নে কেন?

—শেখেননি কেন?

—সময় পাইনি, সত্যি বলছি। এক সময় ভেবেছিলাম ক্যামেট-পর্বতচূড়ায় উঠবো। চেষ্টা করেছিলাম সেদিকে। একবার ভেবেছিলাম নান্সী পর্বতে উঠবো—এশেন্ ব্রেনার যে বছর মারা গেল নান্সী পর্বতের চার নম্বর ক্যাম্প, আমি তখন সেই ভীষণ স্লো-স্টর্মের মধ্যে তিন নম্বর ক্যাম্পে আছি। আমার মাথার ওপর বিরাট নান্সী পর্বতের খাড়া ঢালু-চারিপাশ গুঁড়ো বরফে আচ্ছন্ন, কিছু দেখা যায় না।

—বলুন, বলুন—কি ভালোই লাগে—

—এমন সময় নেপালী ক্যাম্প-ফলোয়ার টুটি থাপা এসে বক্সেন—সব খতম হো গিয়া হুজুর। আমি আর একজন জার্মান—ওটা ছিল জার্মানদের অভিধান—আবার উঠতে লাগলাম চার নম্বর ক্যাম্পে—

—সেই বরফের ঝড়ের মধ্যে?

—না, সাড়ে তিন ঘণ্টা পরে যখন বরফের ঝড় কমলো, তখন।

—আপনার কথা শুনে মনে হয়, এরা কি সব ছোট জিনিস নিয়ে থাকে। এদের এই খেলা, সো-কল্ড স্মার্টনেস, এদের ইংরিজি বুলি আমার এত খারাপ লাগে! বড় জিনিসকে নিয়ে, বড় কল্পনাকে নিয়ে যদি না থাকতে পারা গেল তবে মানুষ হয়ে জীবনের সার্থকতা কি?

মি.সুর হেসে বক্সেন—আমাকে ঘরছাড়া করেছে আজ কিসে? কবে হয়তো ওই বিরাটের স্বপ্ন দেখেছিলাম,তারপর থেকে শুধু মরুভূমিতে, পর্বতে, বনে বেড়িয়ে বেড়াচ্ছি, কিসের যে নেশায় ঘুরিয়ে নিয়ে

বেড়ায়। কতবার নিশ্চিত মৃত্যুর মুখ থেকে বেঁচে এসেছি। মরুভূমিতে দিকহারা হয়ে জলের অভাবে মরণের অর্ধেক পথে পৌঁছে ফিরে এসেছি। সে সব গল্প একদিন করবো মিস মিত্র—নিরিবিলি বসে। আজ এই টেবিল খেলার মাঠ তার উপযুক্ত স্থান নয়।

—শুধু আমাকেই বলবেন কিন্তু।

—আর তো কেউ শুনতে চায় না। এখানকার আর তো কারো শোনবার আগ্রহ নেই, আপনাকেই বলবো।

—বসুন। আপনার জন্যে কি আনবো?

—কিছু না।

—আইসক্রিম খান একটু।

—ধন্যবাদ। আপনি বসুন, ব্যস্ত হবেন না।

এই সময় খেলা ভাঙলো। তরলা, অগ্নিমা ও মি.বাসু একসঙ্গে এসে ওদের ডানপাশের চেয়ারগুলো দখল করলে। মঞ্জুশ্রী ও খুকি সামনে দাঁড়িয়ে রইল।

অগ্নিমা মি.বাসুকে বললে—বার্লি-ওয়াটার?

—থ্যাঙ্কস্। আধ গ্লাস।

সরলা এই সময় অগ্নিমাতে বললে—অনি, মি. সুরের জন্যে একটা আইসক্রিমের কথা অমনি বলে দাও না—

মি. বাসু গলার সুর নিচু করে বললেন অগ্নিমাতে— আইসক্রিম। মেয়েদের খাদ্য বলেই ওটাকে আমার জানা আছে।

অগ্নিমা বললে—সবাই সমান পুরুষমানুষ হয় কি?

—কি নাম বললেন সরলা দেবী? আমি শুনি নি ঠিক। অন্যমনস্ক ছিলাম।

তরলা বললে—মি.সুর। আসুন, ইন্ট্রোডিউস করে দিই।

অগ্নিমা চোখ টিপে বারণ করে বললে—থাক।

মঞ্জুশ্রী হেসে বললে—কেন?

অগ্নিমা বললে—সকলের সঙ্গে সকলের মিশবার যোগ্যতা থাকে কি? আমাকে তুমি নাই বলো মঞ্জু, হয়তো তুমি দোষ দিতে পারো কিন্তু আমার মনে হয় পুরুষ যদি পুরুষের মতো না হয়, তেমনি স্মার্ট না হয়, তাহলে জবুথবু জবড়জঙ্গ ধরনের—

তরলা হি-হি করে হেসে বললে—আর একটা বিশেষণ বাদ দিলে, সেটা হোল—

মঞ্জু অমনি টপ করে বলে ফেললে—জ-র-দ-গ-ব—

সরলা মুখে আঙুল দিয়ে বললে—স্-স্-স্—

এই সময়ে ভৃত্য বার্লির জল, আইসক্রিম প্রভৃতি ট্রে ভর্তি করে নিয়ে এসে তরলার সামনে ধরলে। তরলা ও অগ্নিমা ট্রে থেকে খাদ্য ও পানীয় উঠিয়ে নিয়ে যার যার হাতে পরিবেশন করতে ব্যস্ত হয়ে পড়লো। সকলের আগে মি.বাসুকে ও সর্বশেষে মি.সুরকে দেওয়া হল।

ঠিক এই সময়ে একখানা টু-সিটার অস্টিন ফটকের সামনে এসে দাঁড়াল। তা থেকে নেমে মি.দে আর তাঁর কন্যা শকুন্তলাকে দেখা গেল টেনিস কোর্টে ঢুকছেন।

মি.দে এ-সমাজের চূড়ামণি, পৌরসভার ডেপুটি মেয়র, কলিকাতা হাইকোর্টের নামজাদা ব্যারিস্টার, বড় কংগ্রেসী পাণ্ডা, সাহিত্যিক ও বক্তা। এদের দলে যখন মেশেন, তখন এরা বিনয়ে বিগলিত হয়ে থাকে সর্বদা। ওঁরা টেনিস কোর্টে ঢুকতেই সকলে সমস্বরে ওঁদের অভ্যর্থনা করলে।

—এই যে মি. দে, এই যে মিস দে, আসুন আসুন, সো গুড অফ ইউ টু।

—মিস্ দে-কে যে বড্ড টায়ার্ড দেখাচ্ছে—বসুন—বসুন, ইত্যাদি।

তরলা বল্লে—শকু দিদি—সেই হাজারিবাগ আর এই! কতদিন—

হঠাৎ মি.সুরের দিকে চোখ পড়াতে মি. দে যেন অবাক হয়ে গেলেন। এগিয়ে এসে ওঁর সামনে দাঁড়িয়ে বল্লে— আপনি।

শকুস্তলাও এগিয়ে এসে বল্লে—মি. সুর! সত্যি আপনি?

মি.সুর দাঁড়িয়ে উঠে ওঁদের অভিবাদন করলেন। বল্লে—আমি এখানে মাঝে মাঝে আসি। তবে মধ্যে পাঁচ-ছ'মাস আসিনি।

মি.দে বল্লে—আসবেন কেমন করে? আপনার কথা যে কাগজে বেরিয়েচে আজ, আপনার ছবি পর্যন্ত বেরিয়েচে। শকুস্তলা, কাগজখানা বাড়ি থেকে নিয়ে এসো তো মা, সিঙ্কুনদীর গর্জ আর কেউ বিজয় করেনি এক ফ্রাঙ্ক নর্টন বাদে। বাঙালির মুখ উজ্জ্বল করেচেন আপনি।

মি. সেন বল্লে—ইনি কি করেচেন বল্লে?

মি. দে বল্লে—ইনি হোলেন বিখ্যাত পর্যটক ব্যোমকেশ সুর। এঁর কথা 'ইউ পি'র সমস্ত কাগজে। আমি পরশ লক্ষী থেকে আসচি। সিঙ্কু নদীর বিরাট খাত ইনি একা বেড়িয়ে এসেচেন। কি দুর্গম পদযাত্রা সে! শকু মা কাগজ এনেচো? এই দেখুন এঁর ছবি। পড়ে দেখুন সবটা। বাঙালির মুখ একশোবার উজ্জ্বল করেচেন আপনি। ফ্রাঙ্ক নর্টনের পর এ দুঃসাহসিক কাজ আর কেউ করেনি—সকলে বুঝতে পারবে না ইনি কি করেচেন—বাঙালির মধ্যে এত বড়—

মি. সেন বল্লে—কবে গিয়েছিলেন?

মি.দে কাগজখানা খুলে সকলের দিকে ফিরিয়ে দেখিয়ে বল্লে—দেখুন। এই তো সেদিন ফিরেচেন,আজ দিন-দশ-পনেরো হোল, এই দেখুন এঁর ফটো। মি. সুর, আমাদের কাগজে ধারাবাহিক ভাবে আপনি সিঙ্কু অভিযান লিখুন। পাঁচহাজার টাকা অফার রইল আমার। স্টেটসম্যান জানে না যে আপনি কলকাতায়, তা হোলে এখুনি লুফে নেবে। আমার অফার রইল কিন্তু মি. সুর।

শকুস্তলা মুগ্ধ দৃষ্টিতে মি. সুরের দিকে চেয়ে বল্লে—কাল আমাদের বাড়ি আসুন মি. সুর। গল্প শুনবো আপনার মুখে, কেমন তো?

অণিমা ও তরলা হাঁ করে এদের দিকে চেয়ে দাঁড়িয়ে ছিল। এই সময় মি. বাসু এসে ওঁদের দুজনকে চুপচুপি বল্লে, আমি আসি। একটা এনগেজমেন্ট আছে এখুনি, আচ্ছা গুড নাইট।